



Hazparnen atzo egin zuten elgarretaratzea.

BOB EDME

Ikastolen egoera larria salatu dute Hazparnen

Seaskak aldarrikatu du egoitza publikoaren beharra

Ikastola ainitzen egoera larria salatzeko, Seaskak auto-karabana antolatu zuen atzo. Euskal Herriko txoko guztietatik abiatutako lagunak elkarretaratu ziren Hazparnen eguerdi hirian eta egoitzen arazo larria plazaratu zuten besta giro batean.

Lutxi Fourcade / Hazparne

IPAR EUSKAL HERRIKO ikastolatako gurasoek eta laguntzaileek hitzordua zuten Hazparnen atzo. Izan ere, Seaskak, ikastolen federazioak, gonbidatu zituen ikastolatako guraso et laguntzaile guztiak auto-karabanaren ibilaldian parte hartzera. Elkarretaratze honek bi helburu zituen: lehen-dabizi, jendeari jakinarazi eta hautetsiei aldarrikatu ikastolek egoitzen arazoa zutela; bestalde, egoitza publikoak eskatu zituzten ikastola guztientzat, ama ikastolatik lizeoa arte.

Goizean goizik, auto-karabanaren bost adar abiatu ziren Ipar Euskal Herriko txoko guztietatik eta juntatu ziren eguerdian Hazparneko ezker paretako aparkalekuan. Autoen turutak entzunaraziz, hiriko karrikak zeharkatu zituzten eta manifestaldi txiki bat egin zuten elizaraino. Bertan, Naia Robleseki ongi etorri egin ondoren, Marijo Anetasek, Seaskako lehendakariak, egoeraren balantze kezagarria egin zuen. Izan ere, nahiz eta Seaskak konbenio bat izenpetu Hezkunde Nazionalarekin duela 14 urte, «egoitzen arazo larriak ikusgai dira oraindik ikastola ainitzetan». 21 tokiko ikastetxe dauden gaur egun iparraldean eta azken urteotan, podere publikoek agertu dituzte hiru jarrerak ezberdinak. Hiri batzutan, Udalak bere gain hartu du

ikastolaren egoitza (Miarritze, Hendaia edo Baiona). Beste tokitan, Udalak lurra edo diru laguntza eskaini du ikastola altxatzeko (Angelu, Urruña edo Orzaize). Barnealdean, berriz, podere publikoek ez dute ezer entzun nahi. «Bi lehen kasuetan ikastolen premia kontutan hartu badute ere, hirugarren kasuan ingurumen politikoa osoki blokatua da», azpimarratu zuen Anetasek. Altabada, ele ederrak entzun zituztela gehitu zuen eta «hitzemandako guztia lehen bai lehen gauzatzea ezinbestekoa da».

Seaskako kolegioaren edo lizeoaren geroa ere kezagarria zela aldarrikatu zuten bildutako lagunek. Kolegioa kokatua da Kanboko Xalbador Ikastegian baina hertsiegi izanen da datorren urte-

an. «300 bat ikasle ditugu eta 135 bat sartzekoak dira datorren urtean», azpimarratu zuen Anetasek. Egoerari buru egiteko, bertze kolegio bat sortzea baitezpadakotzat jo zuen, «eta nunbait egitekotan, kostaldean sortuko da». Alabaina, Administrazioak ez du egoera berdin ikusi nahi eta behar diren 121 irakasle ordu eskaini orde, 14 ordu baizik ez dizkio proposatu Seaskari. «Ez da dudarik gutaz trufatzen direla eta gutun bat helarazi diogu errektoreari ezadostasuna adierazteko». Lizeoari dagokionez, Baionako Komertzio Ganbarako behin behineko egoera irauten du. «Gauza franko eskas dugu erakuntza honetan eta sartzeko toki berean egin behar badugu ere, moldakuntza franko baitezpadakoak izanen dira». X

Milaka lagun bildu dira betiko alardearen alde

■ Politikarien eskuhartzea salalatu zuten Irunen

Ane Sarasketa / Irun

MILAKA lagun bildu ziren atzo Irunen bertan San Martzial egunez egiten den alardea emakumezko soldadurik gabe egiten jarraitu behar dela aldarrikatzeko. Manifestazioan herri-tar gehienek ahotza entzun dadin eskatu zuten eta gogor salatu zuten politikarien eskuhartzea.

Arratsaldeko zazpi eta erdiak paseak zirela irten zen manifestazioa Urdanibia plazatik. Alardea politika gabe, Ardanza: herri batek hitz egiten duenean entzun egin behar zaio eta konpainia bakoitzeko emakume bakar bat eta Betiko herriaren alardea zioten lau pankarten atzean abiatu zen jendetza. Espaloietan bildu zen jendeak txaloz hartu zuen manifestazioaren burua; hura pasatu ostean ertzetan zeudenak ere protestaldian sartzen joan ziren. San Martzial kalean hoge minutu igaro ziren manifestazioaren burutik hasi eta eta azken lerroa igaro zen arte.

Manifestazioaren amaieran, San Juan plazan, betiko alardearen aldeko manifestua irakurri zuten. Trebiñoko galdeke-

ta dela eta buruzagi politikoei azken asteotan egindako adierazpenak ekarri zituzten gogora, eta adierazpen horiek Irune-rako ere balio dutela azpimarratuta, herritarren gehiengoaren nahia errespetatu egin behar dela aldarrikatu zuten. «40 pertsonengatik ez dugu 40.000ren nahia bertan behera utziko», ohartarazi zuten.

Manifestazioa aprobetxatuta, emakumeak soldadu gisa desfilatzearen kontra dagoen beste talde bat aurkeztu zen atzo paskinen bidez: Alborada emakume iruindarrak izenekoak. Jendartean banatu zituzten eskuorrietan alarde tradizionalaren aldekoek jaso dituzten erasoak salatu zituzten eta halakorik gehiago jasateko prest ez daudela gehitu. «Gure herria aspaldi honetan eraso fisiko eta moralak jasaten ari da, ez bakarrik Bidasoaldeko Emakumeak eta gure zinegotzien aldetik, baita klase politikoaren aldetik, epaile, sasi-intelektual, kazetari eta herritarren aldetik. Guzti horiek alardeari buruzko iritzia eman dute, gaia ezagutu ez eta hari buruz zer esatekorik ez duten arren», azpimarratu zuten. X



Atzo Irunen egin zen manifestazio jendetsua.

EDURNE KOCH

EUSKO JAURLARITZA



GOBIERNO VASCO

HEZKUNTZA,
UNIBERTSITATE
ETA IKERKETA SAILADEPARTAMENTO DE
EDUCACION, UNIVERSIDADES
E INVESTIGACION

LEHEN MAILAKO LANBIDE HEZIKETAKO TITULUA (TEKNIKARI LAGUNTZAILEA) LORTZEKO ESKOLAKOZ BESTEKO IKASKETEN EBALUAZIO-SAIOETARAKO DEIALDIA

1998ko otsailaren 16ko Erabakian (Otsailak 24ko EHAA), 1996ko otsailaren 28ko-Agindua garatuz (Martxoak 28ko EHAA), lehen mailako Lanbide Heziketako titulua (Teknikari Laguntzailea) lortzeko eskolako besteko ikasketen ebaluazio-saioetarako deia egiten duena.

Erabaki horrek, izenematea martxoaren 23tik apirilaren 3ra arteko epea izango dutela dio, ondoren aipatuko diren ikastetxeetan.

ARABA:	Amurrioko "Zaraobe" B.H.I. Laguadiako "Samaniego" B.H.I. Gasteizko "Ciudad Jardín" B.H.I.
GIPUZKOA:	Donostiako "Easo" B.H.I. Eibarko "Escuela Armeria" B.H.I. Irungo "Playaundi" B.H.I.
BIZKAIA:	Bilboko "Emilio Campuzano" B.H.I. Barakaldoko "Nicolas Larburu" B.H.I. Erandioko B.H.I. Txurdinagako II B.H.I. Iurretako B.H.I. Basauriko "Bidebieta" B.H.I.

Informazio gehiago jaso nahi dutenek ikastetxe hauetan jaso dezakete.
PEDAGOGI BERRIKUNTZARAKO ZUZENDARITZA

IVAP
HERRI ARDURALARITZAREN
EUSKAL ERAKUNDEA

EUSKAL AUTONOMIA ERKIDEGOKO
ADMINISTRATIOAK BEHAR DU:

**INDUSTRIA, NEKAZARITZA ETA
ARRANTZA SAILerako:**

**-MEATEGI ETA INGURUGIRO
ZERBITZUBURUA**

BETEBEHARRAK: -Goi Ingeniaritza/Meategi-
en Ingeniarien atala

-Bost urteko esperientzia
gorputza horri dagozkion
lanetan.

-3. hizkuntza eskakizuna
(derrigortasun egunik
gabea).

Eskabide-orriak eta argibide zehatzagoak
jasotzeko helbideak:

-HAEEn Gasteizko egoitza	Wellingtongo Dukearen kalea, 2
-HAEEn Bilboko egoitza	Errekalde Zumarkalea, 18-1
-HAEEn Donostiako egoitza	Prim, 7
-HAEEn Oñatiko egoitza	Oñatiko unibertsitatea.

Eskaerak aurkezteko epea aurtengo mar-
txoaren 23an, astelehena, 17.00etan amaituko
da.

